



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

19. Kalenderwoche – ab 9. Mai 2010

Begrießungsgeld

Nee, ährlich - mei Gemnidz lob isch mir, es is kee kleens Baris! Goddseisgedank! Odor meschn Sie edwa in so eenor großn Schdadt wohn... - Baris odor Dogio odor Nju Jorg...? Isch nisch! Sogahr Bährlin is mir schon zwee Nummorn zu groß. Un was sich in Bährlin ooch fiehr e Gesindl zusammroddn dud! Das is in alle großn Schdädte so - Verbreschor, Gaunor, Gannovn, Bengor, Mafjosis, Bolledigger...!

Guhd, e baar Gaunor wern mir in Gemnidz ooch ham, abor die falln nisch weidor off im Schdadtbild. Mir sinn ja ooch in dor Schdadisdig die Gäschen in Deuschland mid dor wenischsdn Grimminallidähd! Ja, mir lähm hier so sischor wie in Abrahams Schoß! Fasd wie friehor!

Un einkoofn kannsde bei uns in Gemnidz bisde schwarz wirsd un arm bisd! Mir hamm de greeße Einkoofsfläsche bro Kobb dor Bevölgorung! Un mir haddn ooch schon ma das meisde Grien bro Kobb - also, Barks un Wiesn un Wäldor un so.

Un gleisch ringsrum um Gemnidz hasde eene scheene Landschaft. Bei so rischdisch große Schdädte isses ja ringsrum meisdens dodales Flachland. In Bährlin dud ja schon die Geschend in Brenzlau mid Berg heeßn! Ja, Brenzlauer Berg! Da hasde villeischd grade ma e kleenes Hiegelschn!

In Baris duds ooch sowas gähm - dähn Hieschl dun die dord Mond Barnass nenn!

Ooch was de Gulduhr bedreffn dud... - da ham mir doch werglisch alles, was das Härz begährn dun kann - Dheador, Obor, Schdadthalle, Kabaredd-Kiske...!

Ooch gasdronomisch hasde alles was de brauchn dusd. Heeschdens ehm, dass e baar Gäsde fähln. Wennsde manschma so muddorseelnalleene in eenor Gasdschdädde rumhoggn mussd... das machd keen Schbaß. Scheenor sin de Gasdschdäddn, wenn außor dir noch baar annre da sin. Da sin ooch de Kellnor irschendwie flinkor! Meisdens dusde, wennsde alleene bisd, ewisch wardn, bis ma eenor komm dud. Das annre Egsdrehm is dann, wenn disch drei Kellnor gleichzeitisch umlachorn dun.

Ja, isch gloobe, das eenzsche, was in Gemndiz fähln dud, damid e bißl Lähm is, das sinn e baar Dourisdn. Abor die kömmor uns abschminkn! Die grischn mir nisch! Keene Schangse! Un wenn de Siddymenedschor noch e baar mähr hibsche bunde Wärbehefde druggn lassn... un wennse dobbld soviel Gehald grischn wie jedzde... mid Dourisdn wird nischd! Das is e hisdorischor Nachdeel! Dähn kannsde nisch wegwischn! Heeschdens - du kennedsd nadiehrlich schlau sein - nisch in de Wärbung invesdiern, sondorn das Geld dähnen anbietn, die uns e baar Dourisdn hährbring kenndn. Eenfach alln Busreiseundornähm, die eene Ladung Dourisdn nach Gemnidz karrn dun... bevorse weidorfahrn.. nach Dräsdn odor in de Dscheschei odor so... - wennse also een Daach un eene Nachd in Gemnidz bleim - fiehr eene Busladung dausend Euros bar off de Gralle! So eene Ard Begrießungsgeld fiehr Busgrubbn! Die ganzn bundn Gaddalocher kannsde dir dann klemm. Un währ weeiß, was de noch alles einschbarn kennedsd?

Eduard Sachsenmeyer